

ad obseruationem Canonum ordinemque Ecclesiasticum spectabant? Sed quod ante eum, iam Natalis eiusdem ciuitatis Episcopus etiam Metropolitani autoritate frueretur, patet ex alia Epistola eiusdem ^a Gregorij ad Antoninum Subdiaconum, qua scribit Florentinum Epitauritanæ ciuitatis Episcopum ab hoc Natali depositum fuisse. Nusquam enim nisi à Metropolitano Episcopi antiquitus depositi leguntur. Fateor Gregorium de Natali conqueri, quod Florentinum deposuerit extra Concilium Episcoporum prouinciæ. At ex hoc Natalem Metropolitanum non fuisse Salonæ inferri nullatenus potest, sed tantum, absque comprouincialium Episcoporum, hoc est Synodi prouincialis, sententia haud licuisse Metropolitanis suffraganeos Episcopos deponere, quod verissimum est. Sed his positis, ad Notitiam Episcopatum, qui his Metropolibus subijciebantur, veniamus: quos si paucos numero, & quidē per prouincias tantum ciuiles distinctos, recenseamus, ne mireris, cum in Illyrico, vt ait Liuius^b, solitudines deindustria populando Macedones fecissent, ne transitus faciles Dardanis in Illyricum aut Macedoniam essent: vixque libertatem Ecclesia sub Constantino adepta sit, quod statim hæc regio ab Attila penitus deuastata fuerit, qui vicospassim & oppida igne consumens, omnes cædens, sacra & prophana æquē diruens, nec ætati nec sexui vsquam parcens, omnem regionem sanguine tinxit, vlulatibusque compleuit: tandem Ecclesias & altaria euertit, sedesque Episcopales penē omnes aboleuit. Hac ex ratione vix quidquam certi de prouinciarum Ecclesiasticarum distinctione perspicere potest, vixque vllorum Episcoporum Pannoniæ mentio fit, ab eo vsque ad tempora Stephani Hungariæ Regis, qui Astrici & discipulorum eius opera, Hungaros ad Christum conuertit: multosque Episcopatus fundauit, ac inter eos Strigoniam Metropolitæ sedem esse à summo Pontifice obtinuit.

^a Gregor. mag. ep. 8. lib. 2. ind. 11.

^b Eiu. Decad. 5. l. 3.

NOTITIA ANTIQVA EPISCOPATVVM ILLYRICI OCCIDENTALIS.

PANNONIA INFERIOR SEV SECVNDA, ET SAVIA.

SIRMIVM Ammiano lib. 15. hodie *Sirmich*, totius Illyrici Metropolis. *Photinus* ibi Ecclesijs præfuit, vt loquitur Socrates lib. 2. c. 14. & 24. Illiusque Ecclesiæ Antistes dogma, quod separatim excogitauerat, palam diuulgare conatus est: vnde cum tumultus ex hoc oriretur, Imperator Concilium Episcoporum Sirmij conuocari iussit, quo hunc Episcopatu abdicarunt. Sed & *Germanum* Sirmij Episcopum nominat Sozomenus lib. 4. cap. 14.

M V R S A Æthico in Cosmographia, vulgò *Essek*. *Valens* Murforum Episcopus dicitur apud Socratem lib. 1. cap. 20. ijsque annumeratur, qui, vt ait, contra Athanasium quasi aciem instruxerunt: quique, Theodoretō teste